

Salahkan diri sendiri: Mahathir

Oleh Mohd Shah Abdullah

SUBANG, Selasa – Datuk Seri Dr Mahathir Mohamad berkata, negara-negara Islam harus mempunyai kekuatan material untuk mempertahankan diri daripada terus ditekan dan disembelih oleh pihak musuh.

Menurut Perdana Menteri, akibat tiada kekuatan material itu menyebabkan orang Islam tidak mampu menawarkan pertolongan dan bantuan sewajarnya terhadap saudara seagama yang ditindas.

“Di mana-mana juga mereka (umat Islam) ditekan. Kita hendak marah siapa. Marah diri sendirilah. Kita tidak boleh tolong apa pun. Kita tengok sajalah (musuh) sembelih... sembelihlah,” katanya.

Beliau berkata demikian kepada pemberita sekembalinya dari menghadiri Sidang Puncak Ketua-Ketua Negara Pertubuhan Persidangan Islam (OIC) di Casablanca, Maghribi. Beliau juga melakukan lawatan ke Zagreb, Croatia.

Perdana Menteri ditanya mengenai perkembangan mutakhir membatikan umat Islam di Chechnya yang diserang oleh pesawat pejuang Russia atas arahan Presiden Boris Yeltsin. Askar Russia dihantar ke Chechnya sejak seminggu lalu bagi menggempur republik pemisah itu. Antara kawasan utama

yang menjadi sasaran bedilan pejuang Russia ialah ibu negaranya, Grozny.

Dr Mahathir yang tiba dengan pesawat khas disambut oleh isterinya, Datin Seri Dr Siti Hasmah Mohd Ali; Timbalan Perdana Menteri, Datuk Seri Anwar Ibrahim; Menteri Undang-Undang, Datuk Syed Hamid Albar; Menteri Penerangan, Datuk Mohamed Rahmat; Timbalan Menteri Dalam Negeri, Datuk Megat Junid Megat Ayob dan Timbalan Menteri di Jabatan Perdana Menteri, Datuk Dr Abdul Hamid Othman.

Dr Mahathir yang jelas menunjukkan kekecewaan apabila diajukan soalan mengenai perkembangan di Chechnya, menegur sikap sesetengah pihak di negara ini kerana menganggap pembangunan tidak penting kerana kononnya ia bersifat keduniaan.

“Apabila kita tumpu sedikit kepada pembangunan, ada pihak anggap ini tidak penting. Ini keduniaan. Jadi, kalau kita ada di dunia, kita tidak akan sampai ke akhirat.

“Kita kena ada di dunia dulu, baru boleh sampai ke akhirat. Dunia kena jaga, akhirat pun kena jaga juga.

“Masalahnya, apabila kita menumpukan pembangunan di Malaysia,

LIHAT MUKA 2

Salahkan diri sendiri: Mahathir

DARI MUKA 1

ada orang kata kita materialist'. Kalau kita tidak materialist, bagaimana kita hendak melawan orang yang materialist ini (musuh)," katanya.

Dr Mahathir berkata, antara kelemahan negara yang berlaku terhadap orang Islam ialah mereka terpaksa meminta bantuan musuh untuk membeli senjata bagi mempertahankan diri.

"Untuk membuat senapan pun, kita tidak tahu. Sama-samalah kita fikirkan. Semua orang Islam yang hendak mempertahankan diri, membeli senjata pertahanan dari pada musuh.

"Mana kita boleh lawan. Kita nak buat apa pun tidak tahu. Buat senapan tidak tahu, jauh sekali nak buat kapal terbang atau kapal selam.

"Lepas itu, kita tengoklah saudara-saudara seagama dengan kita disembelih...kita tengok saja.

"Kita tidak boleh buat apa-apa. Salah siapa? Salahkan Russia...buat apa? Salah diri sendirilah," katanya dengan nada kecewa.

Ditanya sama ada beliau masih yakin wujudnya satu bentuk penyelesaian menyeluruh terhadap isu Bosnia-Herzegovina, Dr Mahathir berkata, beliau percaya nasib rakyat di negara Balkan itu sama seperti rakyat Palestin apabila terpaksa mengambil tempoh yang panjang bagi mendapat penyelesaian.

"Croatia mahu wilayahnya dikembalikan dan memang itu pun wilayahnya. Tetapi sekarang Serb sudah melancarkan pembersihan etnik dan menganggap (wilayah itu) sebagai haknya. Croatia pun menghadapi masalah," katanya.

Mengenai kenyataan bekas Presiden Amerika Syarikat, Jimmy Carter, yang bertindak sebagai orang tengah dalam menyelesaikan konflik di negara Balkan itu tetapi memuji komitmen puak Serb untuk berdamai, Dr Mahathir berkata:

"Itulah, mula-mula lagi sudah tidak sedap dengar. Saya berpendapat kalau orang yang membunuh 250,000 orang dianggap sebagai baik, saya tidak faham apa makna baik."